



**Sumáriu Kazu
Tribunál Distritál Baucau
Juñu 2016**

A. Sumáriu prosesu julgamentu kazu iha Tribunál Distritál Baucau

1. Totál kazu ne'ebé JSMP monitoriza: 30

Tipu kazu	Númeru
Artigu 145 Kódigu Penál (KP) & artigu 35 (b) Lei Kontra Violénsia Doméstika (LKVD) - Ofensa ba integridade fízika simples ho natureza violénsia doméstika	9
Artigu 145 (KP) - Ofensa ba integridade fízika simples	
Artigu 258 (KP) - Danu simples	2
Artigu 172 no 173 (KP) - Violasaun seksuál ho agravasaun (<i>insestu</i>)	2
Artigu 154 (KP) - Maus tratus ba kónjuje	2
Artigu 140 (KP) - Omisídiu negligente	2
Artigu 23& artigu 171(KP) - Tentativa koasaun seksuál	1
Artigu 207 (KP) - Kondusaun sem karta	1
Artigu 259 (KP) - Danu agravadu	1
Artigu 138 (KP) - Omisídiu simples	1
Artigu 217 (KP) - Hasoru flora no fauna	1
Artigu 172 (KP) - Violasaun seksuál	1
Artigu 177 (KP) - Abuzu seksuál ba menór (<i>insestu</i>)	1
Totál	30

2. Totál desizaun ne'ebé JSMP monitoriza : 21

Tipu desizaun	Númeru
Suspensaun ba prizaun nia ezekusaun artigu 68 Kódigu Penál	8
Omologa dezisténsia keixa	5
Absolve	2
Pena multa tuir artigu 67 hosi Kódigu Penál	3
Pena prizaun	1
Suspensaun ba prizaun nia ezekusaun artigu 68 ho regra ba konduta artigu 70 letra (g) Kódigu Penál	1
Suspensaun ba prizaun nia ezekusaun artigu 68 Kódigu Penál no absolve	1
Totál	21

3. Total kazu sira ne'ebé adia tuir JSMP nia monitorizasaun : 1

Razaun adiamentu	Númeru
Arguidu la marka prezensa	1
Totál	1

4. Total kazu sira ne'ebé sei kontinua prosesu tuir JSMP nia monitorizasaun:8

B. Deskripsaun sumáriu ba desizaun kazu sira ne'ebé JSMP monitoriza:

1. Krime ofensa ba integridade fizika simples

Nú. Prosesu : 0005/16. BCBQI
Kompozisaun Tribunál : Singular
Juis : Dr. Jose Quintao
Ministériu Públiku : Dr. Luis H. Rangel da Cruz
Defeza : Dr. Antonio Fernandes (Defensória Pública)
Tipu desizaun : Pena prizaun tinan 1 suspende ba tinan 2 ba argidu ADG no
absolve arguidu BDS

Iha 7 Juñu 2016, Tribunál Distritál Baucau prezide leitura sentensa ba krime ofensa ba integridade fizika simples ne`ebé envolve arguidu ADG no BDS hasoru lezadu JPO, iha Suku Ua-Kala, Sub-distritu Baguia, Distritu Baucau.

Ministériu Públiku akuza katak iha 30 Feveireiru 2016, iha tuku 07.00 dadersan, arguidu nain rua tuda lisuk lezadu mezmú la-konsege kona, maibé depois arguidu BDS tebe dala 1 iha lezadu nia kalilin okos halo lezadu monu ba rai. Enkuantu arguidu ADG lori katana taa dala 1 iha lezadu nia ulun. Aktu ne`e rezulta kanek iha lezadu nia ulun no ran sai barak, lezadu konsege ba halo tratamentu iha Sentru Saude Baguia no baixa durante loron 4.

Ministériu Públiku akuza arguidu sira kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 2 ka multa.

Iha julgamentu, arguidu ADG deklara katak lezadu mak tolok arguidu sira nia inan no tebe uluk arguidu BDS nia ain dala 2, no lori katana taa dala 4 ba arguidu maibé la kona tanba arguidu satan netik ho katana. Arguidu deklara mós katak la hatene lezadu nia ulun kanek tanba sira kaer hotu katana. Aleinde ne`e arguidu BDS deklara katak iha akontesementu ne`e lezadu mak tebe dala 2 iha arguidu nia ain.

Wainhira Tribunál konfirma ho lezadu relasiona ho faktus sira iha akuzasaun, lezadu kontinua konfirma faktu sira iha akuzasaun.

Testemuña JX (viziñu) depoimenta katak testemuña haree lezadu mak tebe arguidu BDS dala 2, maibé la haree arguidu ADG taa lezadu. Testemuña seluk ABX (viziñu) depoimenta katak nia haree arguidu ADG taa dala 1 iha lezadu nia ulun maibé la haree arguidu BDS tebe lezadu.

Testemuña ida-tan CX ne`ebé nu`udar mós (viziñu) depoimenta katak iha akontesementu ne`e testemuña haree arguidu BDS ho lezadu tebe malu no arguidu ADG taa dala 1 iha lezadu nia ulun.

Iha alegasaun finál, Ministériu Públiku haktuir katak, mezmú arguidu sira nega faktus hotu iha akuzasaun, maibé lezadu kontinua mantein faktu sira iha akuzasaun. Tanba ne`e husu ba Tribunál aplika pena multa ba arguidu ADG no absolve arguidu BDS.

Enkuantu Defeza haktuir katak bazeia ba deklarasaun arguidu nian, husu ba Tribunál aplika pena ne`ebé justu ba arguidu ADG no absolve arguidu BDS.

Depoizde avalia faktus provadu sira ne`ebé produz durante julgamentu, Tribunál konklui prosesu ne`e no kondena arguidu ADB ho pena prizaun tinan 1 suspende ba tinan 2 no absolve arguidu BDS.

2. Krime ofensa ba integridade fizika simples ho natureza violénsia doméstika

Nú. Prosesu

: 0034/15.BCBCV

Kompozisaun Tribunál : Singular
Juis : Dr. Antonio Fonseca
Ministériu Públiku : Dr. Bemvinda do Rosario
Defeza : Dr. Sidonio M. Sarmiento (Defensória Pública)
Tipu desizaun : Pena prizaun fulan 6 suspende ba tinan 1 no aplika regra ba konduta.

Iha 7 Juñu 2016, Tribunál Distritál Baucau prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu JGP hasoru nia feen, iha Distritu Baucau.

Ministériu Públiku akuza katak iha 17 Maiu 2015, iha tuku 9.00 dadersan, arguidu lori katana nia belar baku dala 2 iha lezada nia kanotak.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples ho moldura penal too tinan 3 ka multa no konjuga ho artigu 35 letra (b) LKVD.

Iha julgamentu, arguidu konfesa faktus hotu iha akuzasaun, deklara katak foin primeira-vez komete krime, diak malu ona ho lezada no arepende ona nia hahalok. Aleinde ne'e, wainhira Tribunál konfirma ho lezada relasiona ho faktu hirak ne'e, lezada kontinua mantein faktu sira iha akuzasaun.

Iha alegasaun finál, Ministériu Públiku haktuir katak arguidu konfesa faktus hotu, foin primeira-vez komete krime no arepende ona nia hahalok. Tanba ne'e husu ba Tribunál aplika pena prizaun tinan 1 suspende ba tinan 1.

Enkuantu Defeza mós haktuir katak tanba arguidu konfesa faktus hotu, diak malu ona ho lezada no arepende ona nia hahalok, nune'e husu ba Tribunál fó pena ne'ebé adekua ba arguidu.

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1. Tribunál mós aplika regra ba konduta atu arguidu apresenta-an periódiku iha Tribunál kada fulan dala 1 durante fulan 6 no selu mós kustu judisiál US\$ 10.00.

3. Krime omisídiu negligente

Nú. Prosesu : 0010/15.VQWTL
Kompozisaun Tribunál : Singular
Juis : Dr. Jose Quintao
Ministériu Públiku : Dr. Domingos G. Barreto
Defeza : Dr. Antonio Fernandes (Defensória Pública)
Tipu desizaun : Absolve

Iha 08 Juñu 2016, Tribunál Distrital Baucau prezide leitura sentensa ba krime omisídiu negligente ne'ebé envolve arguidu EMS (seguransa iha irigasaun) no arguidu JdC (nu'udar

gestor ba irigasaun mota Bebui) hasoru lezadu CM, iha Sub-distritu Uatulari, Distritu Viqueque.

Ministériu Públiku akuza katak iha 26 Feveireiru 2015, iha tuku 13.00 lokraik, depoisde kontrola tiha bee-hasan irigasaun iha mota Bebui, arguidu sira fila ba han iha oras deskansan. Tanba la iha ema ida kontrola, lezadu ho nia maluk sira ba haris besik portaun irigasaun. Derepente bee nia korente maka'as dada lezadu ba liu portaun okos no lezadu mate fatin, tanbá kuaze oras 1 lezadu metin iha portaun okos. Depoisde comunidade sira selok sai portaun mak foin hasai lezadu.

Antes ne'e iha 24 Feveireiru 2015 arguidu JdC loke ona portaun irigasaun nian uituan hodi husik bee ba mota laran no iha fatin refere mós la taka avizu ruma.

Ministériu Públiku akuza arguidu sira kontra artigu 140 letra (2) Kódigu Penál kona-ba omisídiu negligente ho moldura penal too tinan 5.

Iha julgamentu arguidu EMS deklara katak iha akontesementu ne'e arguidu ba han meudia, arguidu foin hatene lezadu metin hela iha portaun okos wainhira haree ema barak iha fatin akontesementu. Depoisde hatene akontesementu e'e arguidu hamutuk ho comunidade sira lori besi selok sai portaun hodi hasai lezadu maibé lezadu mate ona.

Aleinde ne'e arguidu JdC deklara katak iha akontesementu ne'e arguidu ba han meudia, no arguidu EMS mak telephone katak lezadu monu ba portaun irigasaun nia okos. Arguidu atu fila ba fatin akontesementu maibé arguidu EMS la hatan, tanba lezadu nia familia hirus loos. Arguidu mós deklara katak antes ne'e taka ona avizu iha fatin refere katak bandu comunidade labele haris iha fatin ne'e.

Testemuña MF (lezadu nia aman) depoimenta katak testemuña hatene kona-ba akontesementu ne'e tanba haree ema barak iha fatin irigasaun. Wainhira testemuña too iha fatin akontesementu haree katak testemuña nia oan mak monu, testemuña mós deklara liu tan katak fatin ne'e comunidade hotu uza ba haris no laiha avizu ruma maka taka iha fatin refere.

Iha alegasaun final, Ministériu Públiku haktuir katak mantein ninia akuzasaun no husu ba Tribunál kondena arguidu sira tuir akuzasaun.

Enkuantu Defeza haktuir katak arguidu sira nu'udar funsionariu iha obrigasaun servisu no iha direitu mós ba deskansa, iha mós avizu ne'ebé taka iha fatin refere katak bandu comunidade labele haris iha fatin refere. Tanba ne'e husu ba Tribunál absolve arguidu sira hosi prosesu.

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no absolve arguidu sira.

4. Krime ofensa ba integridade fizika simples ho natureza violénsia doméstika

Nú. Prosesu : 0012/16. MNMNT
Kompozisaun Tribunál : Singulár

Juis : Dra. Ercilia de Jesus
Ministériu Públiku : Dr. Alfonso Lopez
Defeza : Dr. Grigorio de Lima (Defensória Pública)
Tipu desizaun : Pena prizaun fulan 6 suspende ba tinan 1

Iha 9 Juñu 2016, Tribunál Distritál Baucau prezide leitura sentensa ba krime ofensa ba integridade física simples ho natureza violénsia doméstika ne'ebé envolve arguidu JS hasoru nia feen, iha Distritu Manatuto.

Ministériu Públiku akuza katak iha 18 Feveiru 2016, iha tuku 14.00 lokraik, lezada fase hela ropa derepente arguidu mai ho kondisaun lanu todan, sein motivu ne'ebé klaru tuku dala 1 iha lezada nia matan fukun.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade física simples ho moldura penal too tinan 3 ka multa no konjuga ho artigu 35 letra (b) LKVD.

Iha julgamentu, arguidu konfesa faktus hotu iha akuzasaun, deklara katak diak malu ona ho lezada, foin primeira-vez komete krime no arepende ona nia hahalok. Aleinde ne'e, wainhira Tribunál konfirma fali ho lezada kona-ba faktu hirak ne'e, lezada kontinua konfirma faktu sira iha akuzasaun.

Iha alegasaun finál, Ministériu Públiku haktuir katak arguidu konfesa totalmente faktus hotu iha akuzasaun no konfirma mós hosi lezada. Tanba ne'e husu ba Tribunál aplika pena ne'ebé adekua ba arguidu.

Iha parte seluk, Defeza haktuir katak arguidu konfesa faktus hotu, diak malu ona ho lezada no deklara katak nia arepende ona nia hahalok. Tanba ne'e husu ba Tribunál aplika pena ne'ebé adekua ba arguidu.

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

5. Krime ofensa ba integridade física simples

Nú. Prosesu : 0004/13.PDBAU
Kompozisaun Tribunál : Singular
Juis : Dr. Hugo da Cruz Pui
Ministériu Públiku : Dr. Alfonso Lopez
Defeza : Dr. Jonas H. da Costa (Defensória Pública)
Tipu desizaun : Omologa pedidu dezisténsia keixa

Iha 13 Juñu 2016, Tribunál Distrital Baucau prezide julgamentu ba krime ofensa ba integridade física grave ne'ebé envolve arguidu AJF no AV hasoru lezadu AdJP, iha Sub-distritu Lospalos, Distritu Lautem.

Ministériu Públiku akuza katak iha 31 Dezembru 2012, iha tuku 12.00 kalan, arguidu nia grupu ho grupu seluk baku malu no lezadu ba sori netik, tanba ne'e arguidu taa dala 1 iha lezadu nia ulun. Aktu ne'e rezulta lezadu tenke baixa iha Sentru Saúde Lospalos durante loron 2.

Ministériu Públiku akuza arguidu kontra artigu 146 letra (a) Kódigu Penál kona-ba krime ofensa ba integridade fizika grave ho moldura penal tinan 2 too tinan 8.

Iha julgamentu arguidu AJF deklara katak momentu ne'e arguidu sira baku malu lezadu ba sori netik, arguidu mós deklara katak haree arguidu AV mak taa lezadu.

Iha julgamentu ne'e, Tribunál labele rona arguidu AV ninia deklarasaun, tanba arguidu ba tiha ona estranjéiru.

Lezadu deklara katak nia rona arguidu sira haksasuk malu, tanba ne'e mak lezadu ba koalia netik. Derepente lezadu hakfodak lezadu nia ulun ran tiha ona, maibé lezadu la hatene se mak taa nia. Lezadu foin hatene katak arguidu AV mak taa nia wainhira polisia halo investigasaun.

Iha alegasaun finál, Ministériu Públiku haktuir katak bazeia ba produsaun provas iha julgamentu, husu ba Tribunál aplika pena prizaun ba arguidu AV no absolve arguidu AJF hosi prosesu.

Enkuantu Defeza haktuir katak Tribunál la bele rona deklarasaun hosi arguidu AV tanba arguidu ba ona estranjéiru, no arguidu AJF deklara katak nia la taa lezadu, no reforsa liutan hosi lezadu. Tanba ne'e husu ba Tribunál aplika pena ne'ebé la limite arguidu AV nia liberdade no absolve arguidu AJF hosi prosesu.

Depoisde avalia faktus provadu sira ne'ebé produs durante julgamentu, Tribunál halo alterasaun jurídika hosi artigu 146 kona-ba ofensa ba integridade fizika grave ba fali artigu 145 Kódigu Penál kona-ba ofensa ba integridade fizika simples.

Relasiona ho alterasaun juridika ne'e, lezadu husu ba Tribunál atu dezisté nia-keixa hasoru arguidu. Bazeia ba pedidu dezistensia keixa hosi lezadu, Tribunál konsidera no omologa akordu hosi pedidu dezisténsia keixa ne'e.

6. Krime ofensa ba integridade fizika simples

Nú. Prosesu	: 0016/14. PDBAU
Kompozisaun Tribunál	: Singulár
Juis	: Dr. Jose Goncalves
Ministériu Públiku	: Dra. Bemvinda do Rosario
Defeza	: Dr. Lino Lopes (Advogadu Estajiáriu)
Tipu desizaun	: Omologa pedidu dezisténsia keixa

Iha 13 Juñu 2016, Tribunál Distritál Baucau prezide julgamentu tentativa konsiliaun ba krime ofensa ba integridade fizika simples ne'ebé envolve arguidu AdCB no JF hasoru lezadu BJB, iha Sub-distritu Baucau Vila, Distritu Baucau.

Ministériu Públiku akuza arguidu sira kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa.

Iha prosesu tentativa konsiliaun ne'e, lezadu hatoo pedidu dezisténsia ba keixa tanba antes ne'e arguidu sira husu ona diskulpa ba lezadu. Aleinde ne'e, arguidu sira mós no fó ona osan US\$50.00 ba lezadu hodi hola ai-moruk ba kura lezadu nia kanek, no lezadu mós perduo ona arguidu sira. Tanba ne'e lezadu husu ba Tribunál atu dezisté nia-keixa hasoru arguidu sira.

Relasiona ho pedidu ne'e, Ministériu Públiku no Defeza apresia ho akordu ne'ebé parte rua decide ona no husu ba Tribunál atu omologa akordu ne'e.

Bazeia ba akordu hosi parte rua no pedidu dezisténsia keixa hosi lezadu, Tribunál konsidera no omologa akordu hosi pedidu dezisténsia keixa ne'e.

7. Krime ofensa ba integridade fízika simples ho natureza violénsia doméstika

Nú. Prosesu	: 0010/15.MNLLB
Kompozisaun Tribunál	: Singulár
Juis	: Dr. Afonso Carmona
Ministériu Públiku	: Dr. Bemvinda do Rosario
Defeza	: Dr. Cancio Antonio (Advogadu Estajiáriu)
Tipu desizaun	: Pena prizaun fulan 5 suspende ba tinan 1

Iha 15 Juñu 2016, Tribunál Distritál Baucau prezide julgamentu ba krime ofensa ba integridade fízika simples ho natureza violénsia doméstika ne'ebé envolve arguidu FB hasoru nia feen, iha Distritu Manatuto.

Ministériu Públiku akuza katak iha 7 Agostu 2015, iha tuku 20.00 kalan, arguidu tuku dala 3 iha lezada nia tilun hun, tuku dala 1 iha lezada nia ulun no dulas lezada nia fuuk.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa no konjuga ho artigu 35 LKVD.

Iha julgamentu, arguidu konfesa faktus hotu iha akuzasaun, arguidu deklarara mós katak depoisde akontesementu liu tiha semana rua arguidu diak malu fali ho lezada no arepende ona nia hahalok. Aleinde ne'e, lezada mós kontinua konfirma faktu sira iha akuzasaun.

Iha alegasaun finál, Ministériu Públiku haktuir katak arguidu konfesa faktus hotu iha akuzasaun, konfirma mós hosi lezada. Tanba ne'e husu ba Tribunál aplika pena prizaun tinan 1 suspende ba tinan 1.

Enkuantu Defeza haktuir katak arguidu konfesa faktus hotu iha akuzasaun, diak malu ona ho lezada. Tanba ne'e husu ba Tribunál aplika pena ne'ebé adekuadu ba arguidu.

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 6 suspende ba tinan 1.

8. Krime danu simples

Nú. Prosesu : 0416/13. PDBAU
Kompozisaun Tribunál : Singulár
Juis : Dr. Afonso Carmona
Ministériu Públiku : Dra. Bemvinda do Rosario
Defeza : Dr. Jonas H da Costa (Defensória Pública)
Tipu desizaun : Omologa pedidu dezisténsia keixa

Iha 16 Juñu 2016, Tribunál Distritál Baucau prezide julgamentu tentativa konsiliaun ba krime danu simples ne'ebé envolve arguidu PS hasoru AX, iha Distritu Lautem.

Ministériu Públiku akuza arguidu kontra artigu 258 Kódigu Penál kona-ba krime danu simples ho moldura penal too tinan 3 ka multa.

Iha prosesu tentativa konsiliaun ne'e, arguidu husu deskulpa ba lezadu no lezadu perdua ona arguidu, nune'e lezadu husu ba Tribunál atu deziste fali nia keixa hasoru arguidu.

Relasiona ho pedidu ne'e, Ministériu Públiku no Defeza apresia ho akordu ne'ebé parte rua decide ona no husu ba Tribunál omologa akordu ne'e.

Bazeia ba akordu hosi parte rua no pedidu dezisténsia keixa hosi lezadu, Tribunál konsidera no omologa akordu dezisténsia keixa ne'e.

9. Krime ofensa ba integridade fizika simples

Nú. Prosesu : 0091/15. PDBAU
Kompozisaun Tribunál : Singulár
Juis : Dr. Jose Goncalves
Ministériu Públiku : Dr. Luis H. Rangel da Cruz
Defeza : Dr. Antonio Fernandes (Defensória Pública)
Tipu desizaun : Omologa pedidu dezisténsia keixa

Iha 20 Juñu 2016, Tribunál Distritál Baucau prezide julgamentu tentativa konsiliaun ba krime ofensa ba integridade fizika simples ne'ebé envolve arguidu AC no LCO hasoru lezada LM, iha Sub-distritu Baucau Vila, Distritu Baucau.

Ministériu Públiku akuza arguidu sira kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa.

Iha prosesu tentativa konsiliaun ne'e, arguidu sira husu deskulpa ba lezada no lezada perdua ona arguidu sira, nune'e lezada husu ba Tribunál atu deziste fali nia keixa hasoru arguidu sira.

Relasiona ho pedidu ne'e, Ministériu Públiku no Defeza apresia ho akordu ne'ebé parte rua decide ona no husu ba Tribunál atu omologa akordu ne'e.

Bazeia ba akordu hosi parte rua no pedidu dezisténsia keixa hosi lezada, Tribunál konsidera no omologa akordu hosi dezisténsia keixa ne'e.

10. Krime ofensa ba integridade fizika simples ho natureza violénsia doméstika

Nú. Prosesu : 0010/15.BCQI
Kompozisaun Tribunál : Singulár
Juis : Dra. Ercilia de Jesus
Ministériu Públiku : Dr. Alfonso Lopez
Defeza : Dr. Antonio Fernandes (Defensória Pública)
Tipu desizaun : Pena prizaun fulan 5 suspende ba tinan 1

Iha 22 Juñu 2016, Tribunál Distritál Baucau prezide leitura sentensa ba krime ofensa ba integridade fizika simples ho natureza violénsia doméstika ne'ebé envolve arguidu AM hasoru nia feen, iha Distritu Baucau.

Ministériu Públiku akuza katak iha 19 Novembru 2015, iha tuku 12.00 meudia, arguidu foti ai-pedasuk baku dala 2 iha lezada nia ulun halo lezada oin nakukun no monu ba rai. Wainhira lezada hader atu halai ba fo hatene iha polisia, arguidu kontinua baku tan dala 4 iha lezada nia kotuk laran, baku dala 2 iha lezada nia kabas no baku dala 2 iha lezada nia ain-tu'ur. Aktu ne'e rejulta lezada konsege ba halo tratamentu iha Sentru Saúde Baguia.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fizika simples ho moldura penal too tinan 3 ka multa no konjuga ho artigu 35 letra (b) LKVD.

Iha julgamentu, arguidu konfesa faktus hotu iha akuzasaun, diak malu ona ho lezada, arepende ona nia hahalok no foin primeira-vez komete krime. Aleinde ne'e, lezada mós kontinua konfirma faktu sira iha akuzasaun.

Iha alegasaun finál, Ministériu Públiku haktuir katak arguidu konfesa faktus hotu, foin primera-vez komete krime no diak malu ona ho lezada. Tanba ne'e husu ba Tribunal aplika pena prizaun ho ninia ezekusaun suspensaun.

Enkuantu Defeza haktuir katak arguidu konfesa faktus hotu, arepende ona nia hahalok no foin primera-vez komete krime. Tanba ne'e husu ba Tribunál fo pena ne'ebé adekuadu ba arguidu.

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 5 suspende ba tinan 1.

11. Krime ofensa ba integridade fízika simples ho natureza violénsia doméstika

Nú. Prosesu : 0004/15.PDBAU
Kompozisaun Tribunál : Singulár
Juis : Dra. Ercilia de Jesus
Ministériu Públiku : Dr. Bemvinda do Rosario
Defeza : Dr. Antonio Fernandes (Defensória Pública)
Tipu desizaun : Pena prizaun fulan 5 suspende ba tinan 1

Iha 23 Juñu 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu TM hasoru nia feen, Iha Distritu Lautem.

Ministériu Públiku akuza katak iha 4 Jullu 2015, iha tuku 20:00 kalan, arguidu tuku dala 2 iha lezada nia hirus matan no tuku dala 2 iha lezada nia kotuk-laran. Wainhira lezada koko atu halai, arguidu duni tuir hodi dulas lezada nia liman no basa dala 3 iha lezada nia hasan parte loos.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa no konjuga ho artigu 35 letra (b) LKVD.

Iha julgamentu, arguidu konfesa faktus hotu iha akuzasaun no arguidu mós deklarata katak diak malu ona ho lezada, arepende ona nia hahalok no foin primeira-vez komete krime. Aleinde ne'e, lezada mós kontinua mantein no konfirma faktu sira iha akuzasaun.

Iha alegasaun finál, Ministériu Públiku haktuir katak arguidu konfesa faktus hotu iha akuzasaun, tanba ne'e husu ba Tribunál aplika pena prizaun tinan 1 suspende ba tinan 1.

Enkuantu Defeza haktuir katak arguidu konfesa faktus hotu, arepende ona nia hahalok no foin primeira-vez komete krime, tanba ne'e husu ba Tribunál aplika pena ne'ebé adekua ba arguidu.

Depoide avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun fulan 5 suspende ba tinan 1.

12. Krime kondusaun sem karta

Nú. Prosesu	: 0052/15. LASRTR
Kompozisaun Tribunál	: Singular
Juis	: Dr. Jose Quintao
Ministériu Públiku	: Dra. Bemvinda do Rosario
Defeza	: Dr. Jose M. Guterres (Defensória Públiku)
Tipu desizaun	: Pena multa US\$15.00

Iha 23 Juñu 2016, Tribunál Distritál Baucau prezide leitura sentensa ba krime kondusaun sem karta ne'ebé envolve arguidu LdC hasoru Estadu RDTL, iha Distritu Lautem.

Ministériu Públiku akuza katak iha 11 Dezembru 2015, iha tuku 09.00 dadersan, arguidu sai hosi uma ho motor too iha rotunda Lautem, polisia hapara arguidu hodi pasa revista no hetan katak arguidu la iha karta kondusaun.

Ministériu Públiku akuza arguidu kontra artigu 207 Kódigu Penál kona-ba krime kondusaun sem karta ho moldura penal too tinan 2 ka multa.

Iha julgamentu, arguidu konfesa faktus hotu iha akuzasaun, foin primeira-vez komete krime no arepende ona nia hahalok.

Iha alegasaun finál, Ministériu Públiku haktuir katak arguidu konfesa faktus hotu no foin primeira-vez komete krime, tanba ne'e husu ba Tribunál aplika pena prizaun tinan 2 suspende ba tinan 2. Enkuantu Defeza husu ba Tribunál aplika pena ne'ebé adekuaudu ba arguidu tanba arguidu konfesa faktus hotu, foin primeira-vez komete krime.

Depoizde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$15.00 no sei selu 0.50 sentavus kada loron durante loron 30. Tribunál mós fiksa pena alternativa durante loron 20 prizaun, wainhira arguidu la kumpri pena multa ne'e no durante fulan 6 arguidu labele lori motor ka kareta.

13. Krime ofensa ba integridade fizika simples

Nú. Prosesu : 0428/13. PDBAU
Kompozisaun Tribunál : Singulár
Juis : Dr. Hugo da Cruz Pui
Ministériu Públiku : Dr. Alfonso Lopez
Defeza : Dr. Sidonio M. Sarmento (Defensória Pública)
Tipu desizaun : Omologa pedidu dezisténsia keixa

Iha 23 Juñu 2016, Tribunál Distritál Baucau prezide julgamentu tentativa konsiliaun ba krime ofensa ba integridade fizika simples ne'ebé envolve arguidu LX hasoru lezada BX no AX, iha Sub-distritu Baguia, Distritu Baucau.

Ministériu Públiku akuza arguidu kontra artigu 145 Kódigu Penál kona-ba ofensa ba integridade fízika simples ho moldura penal tinan 3 ka multa.

Iha prosesu tentativa konsiliaun ne'e, arguidu husu deskulpa ba lezada sira no lezada sira perdua ona arguidu, nune'e lezada sira husu ba Tribunál atu deziste fali sira nia keixa hasoru arguidu.

Relasiona ho pedidu ne'e, Ministériu Públiku no Defeza apresia ho akordu ne'ebé parte rua decide ona no husu ba Tribunál atu omologa akordu ne'e.

Bazeia ba akordu hosi parte rua no pedidu dezisténsia keixa hosi lezada sira, Tribunál konsidera no omologa akordu hosi pedidu dezisténsia keixa ne'e.

14. Krime ofensa ba integridade fízika simples ho natureza violénsia doméstika

Nú. Prosesu : 0006/14. MNNTB
Kompozisaun Tribunál : Singulár
Juis : Dr. Jose Goncalves
Ministériu Públiku : Dr. Alfonso Lopez
Defeza : Dr. Antonio Fernandes
Tipu desizaun : Pena prizaun fulan 6 suspende ba tinan 1

Iha 23 Juñu 2016, Tribunál Distritál Baucau prezide leitura sentensa ba krime ofensa ba integridade fízika simples ho natureza violénsia doméstika ne`ebé envolve arguidu JL hasoru nia feen, iha Distritu Manatuto.

Ministériu Públiku akuza katak iha 29 Dezembru 2014 dadersan, arguidu lori katana taa dala 1 iha lezada niaulun. Aktu ne`e rejulta lezada konsege ba halo tratamentu iha Sentru Saúde Natarbora, no suku pontu 4 iha lezada niaulun ne`ebé kanek.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa no konjuga ho artigu 35 letra (b) LKVD.

Iha julgamentu, arguidu konfesa faktus hotu iha akuzasaun, deklara katak nia arepende ona nia hahalok, diak malu ona ho lezada no foin primeira-vez komete krime. Aleinde ne`e, lezada mós kontinua konfirma no reforsa faktus sira iha akuzasaun.

Iha alegasaun finál, Ministériu Públiku haktuir katak arguidu konfesa faktus hotu, arepende ona nia hahalok no foin primera-vez komete krime. Tanba ne`e husu ba Tribunál aplika pena prizaun ba arguidu maibé suspende arguidu hosi prizaun efetivu. Enkuantu Defeza husu ba Tribunál aplika pena ne`ebé adekua ba arguidu tanba arguidu konfesa faktus sira iha akuzasaun, arepende ona nia hahalok no foin primeira-vez komete krime.

Depoizde avalia faktus provadu sira ne`ebé produs durante julgamentu, Tribunál konklui prosesu ne`e no kondena arguidu ho pena prizaun fulan 6 suspende ba tinan 1.

15. Krime danu simples no furtu simples

Nú. Prosesu : 0902/15. PDBAU
Kompozisaun Tribunál : Singulár
Juis : Dr. Jose Goncalves
Ministériu Públiku : Dr. Alfonso Lopez
Defeza : Dr. Sidonio M Sarmiento (Defensória Pública)
Tipu desizaun : Pena prizaun fulan 3 suspende ba tinan 1 ba krime danu simples no absolve arguidu hosi krime furtu simples.

Iha 24 Juñu 2016, Tribunál Distritál Baucau prezide leitura sentensa ba krime danu simples no furtu simples ne`ebé envolve arguidu DP hasoru lezada DCF, iha Sub-distritu Uatulari, Distritu Viqueque.

Ministériu Públiku akuza katak iha 29 Jullu 2014, iha tuku 12.00, arguidu ho hirus kaer katana atu ba buka lezada ninia laen ne`ebé taa arguidu ninia aman iha lezada nia uma. Maibé tanba la hetan lezada nia laen arguidu (ho nervozu) taa bebak didin uma nian, balde bot, janela uma hamutuk 5, fiu eletrisidade, odamatan 2, kontador eletrisidade 1, kadeira masa 4 ho belador 1 no foti lezada nia telefone. Sasan sira ne`ebé hetan estragus ho total prejuízu US\$673.00.

Ministériu Públiku akuza arguidu kontra artigu 258 Kódigu Penál kona-ba danu simples konjuga ho artigu 251 Kódigu Penál kona-ba furtu simples ho moldura penal too tinan 3 ka multa.

Iha julgamentu, arguidu deklara katak taa deit janela 1, arguidu la estraga sasan sira seluk no la foti lezada nia telefone. Arguidu mós deklara katak nia arepende ona nia hahalok no foin primeira-vez komete krime.

Aleinde ne'e, lezada kontinua mantein faktu sira iha akuzasaun no deklara katak depoisde akontesementu sira lahela ona iha sira nia uma no agora dadaun sira muda ona ba fatin seluk.

Testemuña JF depoimenta katak iha akontesementu ne'e, testemuña la iha fatin akontesementu. Enkuantu testemuña JFP depoimenta katak haree duni arguidu estraga sasan, maibé la haree arguidu foti telefone.

Iha alegasaun final, Ministériu Públiku haktuir katak arguidu konfesa faktus balun no nega faktus balun. Tanba ne'e husu ba Tribunál kondena arguidu ba krime danu simples no absolve arguidu hosi krime furtu simples.

Enkuantu Defeza haktuir katak arguidu komete deit krime danu simples bazeia ba arguidu nia deklarasaun. Tanba ne'e husu ba Tribunal aplika pena ne'ebé adekua ba arguidu no absolve arguidu hosi krime furtu simples.

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ba krime danu simples ho pena prizaun fulan 3 suspende ba tinan 1 no absolve arguidu hosi krime furtu simples.

16. Krime ofensa ba integridade fízika simples ho natureza violénsia doméstika

Nú. Prosesu	: 0335/13. PDBAU
Kompozisaun Tribunál	: Singulár
Juis	: Dr. Jose Quintao
Ministériu Públiku	: Dr. Alfonso Lopez
Defeza	: Dr. Antonio Fernandes (Defensória Pública)
Tipu desizaun	: Pena multa US\$ 30.00

Iha 28 Juñu 2016, Tribunál Distrital Baucau prezide leitura sentensa ba krime ofensa ba integridade fízika simples ho natureza violénsia doméstika ne'ebé envolve arguidu MR hasoru nia feen, iha Distritu Viqueque.

Ministériu Públiku akuza katak iha 2 Novembru 2013, iha tuku 07.00 dader, arguidu rasta lezada too monu ba rai no rezulta lezada nia ain-tuur kanek. Arguidu mós tuku dala 1 iha lezada nia hirus matan no tuku dala 2 iha lezada nia kotuk-laran. Aleinde komete ofensa ba lezada, arguidu mós sobu didin uma nian no lori katana taa rahun raga tau roupa nian 1.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fízika simples ho moldura penal too tinan 3 ka multa no konjuga ho artigu 35 LKVD.

Iha julgamentu, arguidu konfesa faktus hotu iha akuzasaun, deklarata katak arepende ona nia hahalok no foin primeira-vez komete krime. Aleinde ne'e, lezada mos kontinua mantein faktu sira iha akuzasaun.

Iha alegasaun final, Ministériu Públiku haktuir katak arguidu konfesa faktus hotu, arepende ona nia hahalok. Tanba ne'e husu ba Tribunál aplika pena ne'ebé adekua ba arguidu. Aleinde ne'e Defeza mos husu ba Tribunal aplika pena ne'ebé adekua ba arguidu tanba arguidu konfesa faktus hotu, arepende ona nia hahalok no foin primeira-vez komete krime.

Depoizde avalia faktus provadus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$30.00 no sei selu 0.50 sentavus kada loron durante loron 60. Tribunál mos aplika pena alternativa loron 40 prizaun, wainhira arguidu la kumpri pena multa ne'e.

17. Krime maus tratus ba kónjuje

Nú. Prosesu	: 0002/16.BCPVN
Kompozisaun Tribunál	: Kolektivu
Juis	: Dr. Jose Escurial Dr. Hugo da Cruz Pui Dra. Ercilia de Jesus
Ministériu Públiku	: Dr. Luis H. Rangel da Cruz
Defeza	: Dr. Americo Luis Freitas Belo (Advogadu Privadu)
Tipu desizaun	: Pena prizaun tinan 2 suspende ba tinan 2

Iha 29 Juñu 2016, Tribunál Distritál Baucau prezide leitura sentensa ba krime maus tratus ba kónjuje ne'ebé envolve arguidu FP hasoru nia feen, iha Distritu Baucau.

Ministériu Públiku akuza katak iha 7 Janeiru 2016, iha tuku 7.00 dader, arguidu rasta lezada nia fuuk, tuku dala barak iha lezada nia ulun, tebe iha lezada nia hirus-matan no kabun, aperta lezada nia kokorok, riba lezada ba rai no sama iha lezada nia kotuk laran. Aktu ne'e rezulta lezada konsege halo tratamentu iha Sentru Saúde Venilale. Antes ne'e iha tinan 2015, iha tuku 11.00 dader, sein motivu ne'ebé klaru arguidu tuku dala 1 iha lezada nia ulun.

Lezada mos deklarata katak durante moris hamutuk arguidu sempre baku hela deit lezada, maibe lezada la lembra data no tinan akontesementu. Antes ne'e iha tinan 2015, iha tuku 11.00 dader, sein motivu ne'ebé klaru arguidu tuku dala 1 iha lezada nia ulun.

Ministériu Públiku akuza arguidu kontra artigu 154 Kódigu Penál kona-ba krime maus-tratus ba kónjuje ho moldura penal tinan 2 too tinan 6 no konjuga ho artigu 35 Lei Kontra Violénsia Doméstika.

Iha julgamentu, arguidu konfesa parsialmete ba faktu sira iha akuzasaun, arguidu mos deklarata katak agora dadaun arguidu ho lezada separa ona.

Enkuantu lezada kotinua konfirma faktu sira iha akuzasaun no deklarata katak durante moris hamutuk arguidu sempre baka hela deit lezada, maibé lezada la lembra data no tinan akontesementu. Lezada mós deklarata katak depoisde akontesementu liu tiha semana 1 sira konsege rezolve ona problema ne'e tuir kustume Timor nian no agora dadaun sira la hela hamutuk tanba arguidu lakohi ona lezada.

Iha alegasaun final, Ministériu Públiku haktuir katak, mezmua arguidu nega faktus balun iha akuzasaun, maibé lezada kotinua konfirma faktu sira iha akuzasaun. Tanba ne'e husu ba Tribunál aplika pena prizaun tinan 2 maibé suspende nia ezekusaun hosi pena prizaun efektivu. Enkuantu Defeza haktuir katak arguidu rekoñese deit faktu balun ne'ebé nia komete, tanba ne'e husu ba Tribunál aplika pena ne'ebé adekuaudu ba arguidu.

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 2 suspende ba tinan 2.

18. Krime omisídiu negligente

Nú. Prosesu	: 0004/15. MNSBD
Kompozisaun Tribunál	: Singulár
Juis	: Dr. Jose Quintão
Ministériu Públiku	: Dr. Alfonso Lopez
Defeza	: Dr. Cancio A. Freitas (Advogadu Estajiáriu)
Tipu desizaun	: Pena multa US\$75.00

Iha 29 Juñu 2016, Tribunál Distritál Baucau prezide leitura sentensa ba krime omisídiu negligente ne'ebé envolve arguidu IB hasoru lezadu EdRdC, iha Sub-distritu Soibada, Distritu Manatuto.

Ministériu Públiku akuza katak iha 18 Dezembru 2015, iha tuku 13.00 meudia, arguidu sadere hela kilat manu nian iha didin lolon no arguidu ba tuur halimar iha viziñu nia uma. Depoisde ne'e TMAT ne'ebé ho idade tinan 11 foti kilat ne'e tiru ba lezadu nia hirus matan. Aktu ne'e rejulta ran sai barak, TMAT nia aman konsege lori lezadu ba Sentru Saúde Soibada maibe lakonsege salva lezadu nia vida no nia hakotu-is iha Sentru Saúde Soibada.

Ministériu Públiku akuza arguidu kontra artigu 140 Kódigu Penál kona-ba krime omisídiu negligente ho moldura penal too tinan 5.

Iha julgamentu, arguidu konfesa faktus hotu iha akuzasaun, arguidu mós deklarata katak ajuda ona familia lezadu ho valor osan US\$1000.00. Arguidu deklarata katak nia arepende ona nia hahalok no foin primeira-vez komete krime.

Testemuña JMS (TMAT nia aman) depoimenta katak iha akontesementu ne'e testemuña iha hela dapur rona kilat tarutu no lezadu tanis mak testemuña halai ba haree lezadu kanek ona, testemuña konsege lori lezadu ba sentru saude, maibé too iha sentru saúde lezadu hakotu nia is.

Iha alegasaun finál, Ministériu Públiku haktuir katak arguidu kofesa faktus hotu, tanba ne'e husu ba Tribunál aplika pena ne'ebé adekuadu ba arguidu.

Aleinde ne'e Defeza haktuir katak arguidu konfesa faktus hotu iha akuzasaun no ajuda ona lezadu nia familia, tanba ne'e husu ba Tribunál aplika pena ne'ebé adekuadu ba arguidu.

Depoisde avalia faktus provadus sira ne'ebé produs durante julgamentu, Tribunál konklui prosesu ne'e no kondena arguidu ho pena multa US\$70.00 no sei selu 0.50 sentavus kada loron durante loron 150. Tribunál mós fiksa pena alternativa durante loron 100 prizaun, wainhira arguidu la kumpri pena multa ne'e no selu mós kustu judisiál US\$ 10.00.

19. Krime danu simples

Nú. Prosesu	: 0165/114. PDBAU
Kompozisaun Tribunál	: Singular
Juis	: Dr. Antonio Fonseca
Ministériu Públiku	: Dra. Bemvinda do Rosario
Defeza	: Dr. Juvinal Yanes
Tipu desizaun	: Omologa pedidu dezisténsia keixa

Iha 29 Juñu 2016, Tribunál Distritál Baucau prezide julgamentu ba krime danu agravadu ne'ebé envolve arguidu AP, EdS no ATG hasoru Ministériu Edukasaun, iha Sub-distritu Baguia, Distritu Baucau.

Ministériu Públiku akuza katak 1 Feveireiru 2014, iha tuku 10.00 dader, arguidu sira ho kondisaun lanu ba iha Eskola Sekundaria Taur Matan Ruak Baguia hodi buka alunus ne'ebé fulan hirak liu ba baku nia (arguidu AP). Depoisde hetan tiha alunus refere arguidu AP tuku dala 1 iha alunus ne'e nia hasan parte loos. Alunus sira ne'ebé haree akontesementu ne'e halai namkari hotu, tanba ne'e mestre Lda husu tuir arguidu sira nusa maka baku alunus ne'e. Maibé depoisde ne'e, arguidu AP, EdS no ATG foti fatuk boot tuda lisuk ba vidru janela eskola nian. Aktu ne'e rejulta vidru tahan 54 mak rahun.

Ministériu Públiku akuza arguidu sira kontra artigu 259 Kódigu Penál kona-ba krime danu agravadu ho moldura penal tinan 2 too tinan 8.

Iha julgamentu, arguidu sira konfesa faktus hotu iha akuzasaun no arguidu sira mós deklarata katak depoisde akontesementu ne'e sira entrega-an ba Polisia Estasaun Baguia. Aleinde ne'e vidru ne'ebé arguidu sira estraga hadia fali ona, sira arepende ona sira nia hahalok no foin primeira-vez komete krime.

Testemuña Lda (diretór eskola) depoimenta katak arguidu sira tuda rahun duni vidru eskola nian, maibé iha 2 Feveireiru 2014 arguidu sira husu ona deskulpa no hadia fali ona vidru ne'ebé arguidu sira estraga.

Iha alegasaun finál, Ministériu Públiku haktuir katak, arguidu sira arepende ona sira nia hahalok, maibé atu prevene arguidu sira nia hahalok iha futuru, husu ba Tribunál aplika pena prizaun tinan 2 suspende ba tinan 3.

Enkuantu Defeza haktuir katak arguidu sira konfesa faktus hotu iha akuzasaun no ho konsensia rasik hadia fali vidru eskola nian ne`ebé sira estraga ona, tanba ne`e husu ba tribunal aplika pena ne`ebé adekuadu ba arguidu sira.

Depoisde avalia faktus provadu sira ne`ebé produs durante julgamentu, Tribunál halo alterasaun juridiku hosi artigu 259 kodigu penál konabá krime danu agravadu ba fali artigu 258 Kódigu Penál kona-ba krime danu simples. Depoisde halo tiha alterasaun ne`e, diretor eskola refere ka nu`udar (testemuña LdA) husu atu dada fali keixa ne`e. Tanba ne`e Tribunál konsidera no omologa pedidu dezisténsia keixa ne`e.

20. Krime ofensa ba integridade fizika simples ho natureza violénsia doméstika

Nú. Prosesu	: 0030/15.PDBAU
Kompozisaun Tribunál	: Singular
Juis	: Dra. Ercilia de Jesus
Ministériu Públiku	: Dr. Alfonso Lopez
Defeza	: Dr. Antonio Fernandes (Defensória Públiku)
Tipu desizaun	: Pena prizaun fulan 5 suspende ba tinan 1

Iha 30 Juñu 2016, Tribunál Distritál Baucau prezide leitura sentensa ba krime ofensa ba integridade fizika simples ho natureza violénsia doméstika ne`ebé envolve arguidu CG hasoru nia feen, iha Sub-distritu Lautem, Distritu Lautem.

Ministériu Públiku akuza katak iha 12 Novembru 2015 tuku 07.00 dader, arguidu tuku dala 1 iha lezada nia reen-toos no foti katana amesa atu taa lezada, maibé lezada kaer netik arguidu nia liman nune`e katana refere monu no kona fali ba iha lezada nia ulun tanba iha momentu ne`eba lezada tuur hela. Aktu ne`e rezulta lezada konsege ba halo tratamentu iha Sentru Saude Lospalos no halo tratamentu iha uma durante semana 3.

Ministériu Públiku akuza arguidu kontra artigu 145 Kódigu Penál kona-ba krime ofensa ba integridade fizika simples ho moldura penal too tinan 3 ka multa no konjuga ho artigu 35 LKVD.

Iha julgamentu, arguidu konfesa faktus hotu iha akuzasaun, deklara katak arepende ona nia hahalok, no depoisde akontesementu sira hela separa ona tanba agora dadaun lezada hela ho ninia familia, mezmu nune`e arguidu hakarak simu fali lezada.

Aleinde ne`e, lezada kontinua mantein faktu sira iha akuzasaun. Lezada mós deklara katak agora dadaun hela separa ho arguidu, tanba durante moris hamutuk, arguidu sempre uza katana amesa lezada nune`e lezada tauk ba hela ho nia familia.

Iha alegasaun finál, Ministériu Públiku haktuir katak arguidu konfesa faktus hotu, konfirma mós hosi lezada. Tanba ne`e husu ba Tribunál aplika pena prizaun ba arguidu.

Enkuantu Defeza haktuir katak arguida konfesa faktus hotu, atu garantia krime ne`e labelle akontese tan iha futuru husu ba Tribunál aplika pena prizaun fulan 6 suspende ba tinan 1.

Depoizde avalia faktus provadu sira ne`ebé produs durante julgamentu, Tribunál konklui prosesu ne`e no kondena arguidu ho pena prizaun fulan 5 suspende ba tinan 1.

21. Krime violasaun seksuál ho agravaun

Nú.Prosesu	: 0015/15.MNLAL
Kompozisaun Tribunál	: Kolektivu
Juis	: Dra. Ercilia de Jesus Dr. Afonso Carmona Dr. Jose Escurial
Ministériu Públiku	: Dr. Luis H. Rangel da Cruz
Defeza	: Dr. Jose M. Guterres
Tipu desizaun	: Pena prizaun

Iha 30 Juñu 2016, Tribunál Distritál Baucau prezide leitura akordaun ba krime violasaun seksuál (inestu) ho agravaun ne`ebé envolve arguidu MVS hasoru nia-oan ho tinan 16, iha Distritu Manatuto.

Ministériu Públiku akuza katak iha 12 Agostu 2015, iha tuku 08.00 kalan, arguidu ho forsakous lezada hatoba iha kama leten no komete violasaun seksuál ho lezada. Aktu ne`e rejulta lezada tenke halo tratamentu iha Pradet.

Aleinde ne`e wainhira lezada sei iha tinan 14 arguidu sempre hatudu nia orgaun seksuál (jenital) ba lezada atu kaer no hatudu filme porno iha telefone ba lezada.

Ministériu Públiku akuza arguidu kontra artigu 172 Kódigu Penál kona-ba krime violasaun seksuál, konjuga ho artigu 173 letra (a no d) Kódigu Penál kona-ba relasaun familia no lezada ninia idade kiik liuhosi tinan 17 konjuga ho artigu 35 no 38 Lei Kontra Violénsia Doméstika.

Iha julgamentu, arguidu nega faktus hotu iha akuzasaun, arguidu deklara katak iha akontesementu ne`e arguidu nia feen mós iha uma, wainhira polisia halo kapturasaun arguidu hakfodak, tanba la hatene problema ne`ebé akontese.

Wainhira Tribunál konfirma fali ho lezada relasiona ho faktu hirak ne`e, lezada kontinua mantein faktu sira iha akuzasaun, no deklara katak iha akontesementu ne`e lezada ho arguidu mesak iha uma. Lezada sente tauk konta akontesementu ne`e ba lezada nia avo no lezada nia avo lori lezada ba iha polisia no uma mahon.

Testemuña MdC (lezada nia avo mane) depoimenta katak hatene akontesementu ne`e, tanba lezada mak konta ba testemuña, ho nune`e testemuña lori kedas lezada ba hato`o keixa iha polisia.

Testemuña RDX (arguidu nia feen) depoimenta katak iha akontesementu ne'e testemuña mós iha hela uma, maibé la hatene buat ida.

Iha alegasaun finál, Ministériu Públiku haktuir katak, mezmu arguidu nega faktus hotu iha akuzasaun, maibé lezada kontinua mantein faktu sira iha akuzasaun. Tanba ne'e husu ba Tribunál kondena arguidu ho pena prizaun tinan 18. Enkuantu Defeza husu ba Tribunál absolve arguidu, tanba arguidu deklara katak nia la komete krime ne'e.

Depoisde avalia faktus provadu sira ne'ebé produs durante julgamentu, Tribunál konklui prosesu ne'e no kondena arguidu ho pena prizaun tinan 15.

Atu hetan informasaun kompleitu, favor kontaktu:

Luis de Oliveira Sampaio
Diretór Ezekutivu JSMP
E-mail: luis@jsmp.minihub.org